

七十二家集

陸太常集引

梁氏多才自任沈外陸佐公為
之冠駢軌竟陵平分八友非若晚
彥之攀鱗也石闕漏刻二銘
東序摘芡高壇蒞景其他短
篇都復爛然總至感知已賦世

鮮知者余嘗舉以敵彥昇答
賦殆欲勝之夫其締交父行翻
承翊戴正不虛耳憶佐公阿父
德明時人謂水可當醴泉而樹
可當交讓佐公年少精勤却於
宅內起兩間茅屋謝絕往來盡

夜擁書是又樹且奠三珠而泉乃
飛百脉耶余屢過吳求陸氏故
居不可得考吳志佐公墓在綬
山詢之故老亦了不知處即從子
襄之立石竟復雨滅湮沉獨是
翡林賸綵流播中區陵谷不能

載之而去者也公賴此永矣

旃蒙赤奮若早春日張燮識于
吳舫

陸太常集目錄

卷之一

賦

感知已賦

任昉答陸倕感知已賦附

思田賦

賦體

詩

和昭明太子鍾山解講

昭明太子鍾山解講附

以詩代書別後寄贈京邑僚友

贈任昉詩

聯句

清暑殿聯句栢梁體

表

爲豫章王慶太子出宮表

除詹事表

拜吏部郎表

爲王光祿轉太常讓表

爲張纘謝兄尚書謚靖子表

章

授潯陽太守章

教

爲豫章王拜後赦教

未至潯陽郡教二首

卷之二

書

與徐僕射薦沈峻書

答釋法雲書

啓

爲張侍中謝啓

爲息纘謝勅賜朝服啓

遷吏部郎啓

謝勅使行江州事啓

銘

新漏刻銘

石闕銘

蠡杯銘

碑

天光寺碑

墓誌銘

誌法師墓誌銘

祭文

釋奠祭孔子文

請雨賽蔣王文

附錄

陸倕傳

陳姚察

陸倕傳

唐李延壽

太常卿陸倕墓銘

梁元帝

酬陸長史倕

梁劉孝綽

侍宴餞陸倕應令

梁蕭子顯

遺事

集評

陸太常集卷之一

梁吳郡陸倕佐公著

明閩漳張爕紹和纂

賦

感知已賦

夜申旦而不寐獨匡坐而怨咨命僕夫而夙駕
指南館而爲期學窮書府文究辭林旣耳聞而
存口又目見而登心似臨淄之借書類東武之
飛翰軫工遲於長卿踰巧速於王粲固乃度平

子而越孟堅何論孔璋而與公幹或欲涉其涯
涘求其界畔則浩浩港港彪彪汧汧譬長鋏於
鞘中若龍淵與蜀漢濟濟冠蓋祁祁儻逸有竊
風以味道咸交臂而屈膝或望路以窺門空升
堂而入室彼春蘭及秋菊尚蕪絕於衆芳矧重
仁與襲義信遼遼兮未央言追意而不逮辭欲
盡而復忘竊仰高而希驥忽脂車而秣馬旣一
顧之我降亦東壁之余假似延州之如舊同伯
喈之倒屣附蒼颉於驥尾託明鏡於朝光謂虛

無而爲有布籍甚於游揚於是柔條颯其成勁
白露變而爲霜歲忽忽而逝盡憂與愛兮未忘
聚落莖於虛室聽羈雀於枯楊悵鬱悵其誰語
獨撫抱而增傷託異人以蠲憂賴奇文而愈疾
索黃瓊之寄居造安仁之狹室車出門其已歡
無論銜枯與促膝譬鄒子之唵松故未寒而能
慄徒納壤以作高陋吞舟而爲網值墨子之愛
兼逢太丘之道廣陪九萬以齊征激三千而同
上識公沙於梓白拔孝相於無名非夫人之爲

感孰云感於余情指北芒以作誓期鬱鬱於佳
城

任昉答陸倕知己賦附

原知己之時義故相知之信然乃貪廉之異
貫柰勇怯之相懸貪在物而成累怯在我而
可甄旣自得於爲御又甘心於執鞭矧相知
其如此獨攬涕而潸潸雖有望於已知更非
謂其知己信偉人之世篤本侯服於陸鄉緬
風流與道素襲袞衣與繡裳逮伊人而世載

金三駿而龍光過龍津而一息望鳳條而載
翔彼白玉之雖潔此幽蘭之信芳思在物之
取譬非升斛而能量匹聳峙於東嶽比凝厲
於秋霜不一飯以忘過每三錢以投涓匪蒙
袂之敢嗟豈溝壑之能衣旣蘊藉其有餘又
澹然而無味得意同乎卷懷違方似乎仗氣
類平叔而靡雕似子臺而不朴冠衆善而貽
操綜群言而名學折高戴於后臺異鄒顏乎
董幄探三詩於河間訪九師於淮曲術兼口

傳之書藝廣鏗鏘之樂時坐睡而懸梁裁據
梧而錐幄旣文過而意深又理勝而辭縉咨
余生之荏苒追歲暮而傷情測徂陰於堂下
聽鳴鐘於洛城唯忘年之陸子定一遇於班
荆余獲田蘇之價爾得海上之名信落魄而
無產終長勤於短生饑虛表於徐步逃責顯
於疾行子比我於叔則又方余於耀卿心照
情交流言靡惑萬類開求千里懸渴言象可
廢筌蹄自默居非連棟行則同車冬夜不長

夏日靡餘肴核非餌絲竹豈娛我未捨駕子
已廻輿中飲相顧悵然動色邦壤雖殊離舍
難測存異山陽之居沒非要離之側以膠投
漆中離婁豈能識

思田賦

歲聿忽其云暮庭草颯以萎黃風颼颼以吹隙
燈黯黯而無光獨展轉而不寐何增歎而自傷
於是踰迥徙倚顧景興懷魂恍恍以至曙綴予
想於田萊彼五畝其焉在乃爰泊乎江隈出郭
門而東騫入澍浦而南迴爾乃觀其水陸物產
原隰形便林藪挺直丘陵帶面臨九曲之迴江
對千里之平甸風去蘋其已開日登桑而先見
聽啁晰之寒鷄弄差池之春燕臨場圃以築館

對櫺軒而鑿池集游泳於階下引朝派於堂垂
瞻巨石之前却玩激水之推移雜青莎之漚靡
拂細柳之長枝感風燭與石火嗟民生其如寄
苟有胸而無心必行難而言易幸少私而寡欲
兼絕仁以棄智忽學步而學趾又追飛而厲翅
瞻鹿苑而竊高仰疆臺而慕義歷四時於遊水
馳三稔於申臂望歸流而載懷情鬱挹其何寘

賦體

奉欽明之睿后沐隆平之玄化參振鷺之充庭
侍長徒之曾舍冀無恨於終南豫告成於芝駕
雖就列而陳力終胡顏於長夜

詩

和昭明太子鍾山解講

終南鄰漢闕高掌跨周京復此虧山嶺穹窿距
帝城當衢啓珠館臨下拂山楹南望窮淮潑北
眺盡滄溟步簷時中宿飛階或上征網戶圖雲
氣龕室畫仙靈副君憐世網廣命萃人英道筵
終后說鑾轡出郊坰雲峰響流吹松野映風旌
睿心嘉杜若神藻茂琳瓊多謝先成敏空願後
乘榮

昭明太子鍾山解講附

清宵出望園
詰晨屆鍾嶺
輪動文學乘
笳鳴賓從靜
嗽出巖隱
光月落林餘
影糾紛八桂
密波隨再城
永伊予夔丘
壑登高至節
景迢迢覩千
室迢迢觀萬
頃卽事已如
斯重茲遊勝
境精理旣已
詳玄言亦兼
遲方知惠疑作惠帶人囂
虛戒妨屏眺
瞻情未終龍
鏡忽遊騁非
日樂逸遊意
欲識箕頰

以詩代書別後寄贈京邑僚友

余本水鄉士閉門江海隅時逢世道泰蹇是步
高衢名成宦雖立效微功日疎入仕乘肥馬出
守擁高車關門遊昔吏遷亭有故書江派資賢
牧宗英出建旗不勞王布鼓無賴露田車弼政
非責實求名已課虛長卿病猶在修齡疾未祛
詎知亭長肉寧挂府丞魚不能未能止內訟慙
諸已僂俛從王事纚舟出淮泗朋故遠追尋暝
宿清江陰明旦一分手翻飛各異林歸舟隨岸
曲猶聞歌棹音行者日超遠誰見別離心夕次

洲洲羊明登慈姥岑水流多迴復余歸良未尋

江關

一作中

寒事早夜露傷秋草心屬姑蘇臺日

送邯鄲道葭菼日蒼蒼親知慎早涼劉兄消渴

病休攝戒無良殷弟癩眩疾行止避風霜劉侯

有餘冷宜餌隄

一作休

釐方伏子多風咳門冬幸

易將率更憂雅體體弱思自強吏曹勉玉潤諷

議最金相比部多暇日奚用肆龍章建德何爲

者無墮無人鄉記室朋從暇露螭附行商議曹

坐朝罷尺板嗣徽芳雙栖成獨宿俱飛忽異翔

眷言思親友
沉思結中腸
追惟疇昔時
朝府多歡暇
薄慕塵埃靜
飛蓋遙相遶
李郭或同舟
潘夏時方駕
娛談終美景
敷文永清夜
促膝豈異人
戚戚皆朋姻
一作姪今者一乖離
漼然心事差
山川望猶近
便似隔天涯
玉躬子加護
昭質余未虧
八行思自勉
一札望來儀

贈任昉詩

昉爲御史中丞後進皆宗之時有彭城
劉孝綽綽劉苞劉孺吳郡陸倕張率陳郡
殷芸沛國劉顯及到溉到洽車軌日至
號曰蘭臺聚

和風雜美氣下有真人遊壯矣荀文若賢哉陳
太丘今則蘭臺聚萬古信爲儔任君本達識張
子復清修既有絕塵到後見黃巾劉

聯句

清暑殿聯句栢梁體

居中負袞寄纓紱

梁武帝

言慙輻輳政無術

新安太守

任昉至德無垠愧違弼

侍中徐勉

燮贊京河豈微物

丹陽

丞劉洸

竊侍兩宮慙樞密

黃門侍郎柳惔

清通簡要臣豈

汨

吏部郎中謝覽

出入帷帟濫榮秩

侍中張卷

複道龍樓歌

楫實

太子中庶子王峻

空班獨坐慙羊質

御史中丞陸杲

嗣以

書記臣敢匹

右軍主簿陸倕

謬參和鼎講畫一

司徒主簿劉治

鼎味參和臣多匱

司徒左西屬江曹

表

爲豫章王慶太子出宮表

臣聞周固本支寔資明兩漢啓磐石必係元良
所以闡弘祚鼎光崇守噐伏惟皇太子道契生
知照均天縱不藉審論之功無待溫文之輔而
冬書秋記夙表睿資春誦夏絃幼彰神度雖復
直門守令長壽察微魏贊多容漢稱寬博不足
以連輝茂則匹景令圖甲觀惟新桂宮告始朱
班徙次翠蓋移陰華裔式瞻人祗頌舞

除詹事表

中陽白水徒庇微軀送珥抱薪未聞成績陳席
不棄故劍無遺遂宣時髦升降清顯尊官厚秩
無因而至陋巷華門鬱成爽塏儲端華重實異
恒司南章馬官已擇儒雅寶嬰許商爰取姻戚
自茲已降名器日隆歷選才賢若何叨越

拜吏部郎表

銓衡庶品歷選賓寮阮咸貞素屢薦未登陸亮
忠心裁居拜職自非李重清識李穀恬正則何
以區分管庫式鑒胥史

爲王光祿轉太常讓表

昔者楚德方威孫叔濯衣漢道克隆王陽結綬
故拜命無辭受爵不讓况宗卿清重歷選所難
漢晉以降莫非素範辭爵則桓郁張奮讓封則
丁鴻劉愷潘尼之文雅深純華表之從容退默
自此迄茲風流繼軌以臣况之曾無等級

爲張績謝兄尚書諭靖子表

亡兄夙膺皇慈早邀靈慶立言著績未酬天寵
門衰祚寡遽辭昌運拊心摧恨私懷罔極日月
告時幽挺浸遠王人猥集佳冊光臨榮溢里廛
恩深松檟

章

授潯陽太守章

鏤永雕脂不見大龍之象課虛叩寂寧聞駕辯
之音徒荷容蓋空班推擇不能使府庭生梓橫
閣誦經俯睨朱轡仰瞻繒蓋漏上嚴辨伏軾多
慚

教

爲豫章王拜後赦教

夫議獄緩死著在令圖疑罪惟輕聞之雅誥是以虞經惻隱流涕冬決鍾意垂仁哀矜寒送吾以虛薄夙頒寵章光宅襟險奄有全粵非有沛獻矜嚴空紆青組東平智思徒舉赤帷思所以仰述皇猷導揚弘澤遵彼下車譬茲解綯

未至潯陽郡教

第五倫之臨會稽躬斬焉草鄧伯道之莅吳郡
自運家糧故能使吏作頌歌民胥興詠太守薄
德謬叨龜組竊願已祇聞坐接客思匹吳隱被
絮對賓常藥自隨式瞻無遠單車入境竊所庶
幾舊湏發民治道及戍邏掄樵採諸如此類一
皆省息

又

太守家本諸生伏膺典記光武靈臺之籍較涉
根基張華聚土之書略見庭戶貴郡圖載具存
方策校以山經參諸括象原野城寺宛在心目
龍泉鶴嶺不易窮登所撰郡圖可勿親用公孫
陸戟既似井蛙延壽執戈實同見戲

陸太常集卷之二

梁吳郡陸倕佐公著

明閩漳張燮紹和纂

書

與徐僕射薦沈峻書

五經博士庾季達湏換計公家必欲詳擇其人
凡聖賢可講之書必以周官立義則周官一書
實爲群經源本此學不傳多歷年世北人孫詳
蔣顯亦經聽習而音革楚夏故學徒不至惟助

教沈峻特精此書比日時聞講肆群儒劉品沈
宏沈熊之徒並執經下坐北面受業莫不歎服
人無間言弟謂宜卽用此人命其專此一學周
而復始使聖人正典廢而更興累世絕業傳於
學者

答釋法雲書

辱告惠示至尊所答臣下審神滅論昔者異學
爭途孟子抗周公之法小乘亂道龍樹陳釋迦
之教於是楊墨之黨舌舉口張六師之徒轍亂
旗靡言神滅者可謂學僻而堅南路求燕北轅
首楚以斯適道千里而遙聖上愍其迷途爰奮
天藻鉤深致遠盡化知神俾此困蒙均斯永釋
陳茲要道同彼月照弟子並以凡薄沾竊恩紀
纓冕則天之朝飡提稽古之論贊幸之誠獨知

踴躍猥頒告逮謹用書紳陸儒呈

啓

爲張侍中謝啓

陳力就列不能省止實欲強飯據鞍自窮心力
濡足摩頂少報洪私徒課虛無空延鐘箭不悟
爰降曲慈復叨清顯職司近切任掌總綸魏選
異才漢求高德官次恪居鮮非民譽仰瞻內省
無一可階

爲息纘謝勅賜朝服啓

玄冕素帶出自禁財朱紱青縞降於皇府輝燭
隣黨震耀街衢姻族移聽朋儕改矚非臣隳弱
所能陳報

遷吏部郎啓

臣器均濩落材同擁腫效非積山勤垂附地自
叨榮秩列裁移氣序而坐延曲私遂被洪造自
非割蚌識珠覩石知玉寧可以獲名理俗見操
就教

謝勅使行江州事啓

封畛遐曠屢井奧實陸海神臯偏屬茲境兼以
茂親明德維翰作鎮宣述條教匡贊盛猷自非
問望兼逢寧可擢膺嘉舉

銘

新滿刻銘

夫自天觀象昏旦之刻未分治歷明時盈縮之
度無準挈壺命氏遠哉義用揆景測辰徼官戒
井守以水火分茲日夜而司曆亡官疇人廢業
孟陬殄滅攝提無紀衛宏載傳呼之節較而未
詳霍融敘分至之差詳而不密陸機之賦虛握
靈珠孫綽之銘空擅岷玉弘度遺篇承天垂旨
布在方冊無彰器用譬彼春華同夫海棗寧可

以軌物字民作範垂訓者乎且今之官漏出自
會稽積水遠方導流乖則六日無辨五行不分
歲躔閼茂月次姑洗皇帝有天下之五載也樂
遷夏諺禮變商俗業類補天功均柱地河海夷
晏風雲律呂坐朝晏罷每旦晨興屬傳漏之音
聽雞人之響以爲星火謬申金水違用時乖啓
閉箭異鎗銖爰命日官草創新器於是脩察旁
羅登臺升庫則于地四參以天一建武遺蠹咸
和餘舛金簡方圓之制飛流吐納之規變律改

經一皆懲革天監六年太歲丁亥朔十六日壬寅漏成進御以考辰正晷測表候陰不謬圭撮無乖黍累又可以校運筭之聯合辨分天之邪正察四氣之盈虛課六歷之疎密末世貽則傳之無窮赫矣煥乎無德而稱也昔嘉量徵物盤盂小器猶且昭德記功載在銘典况入神之制與造化合符成物之能與坤元等契勲倍楹席事百巾机寧可使多謝曾水有陋昆吾金字不傳銀書未勒者哉乃詔小臣爲其銘曰

一暑一寒有明有晦神道無跡天工罕代乃置
挈壺是惟熙載氣均衡石晷正權槩世道交喪
禮術銷亡遽遷水火爭倒衣裳擊刃舛次叢木
乖方爰究爰變時惟我皇方壺外次圓流內襲
洪殺殊等高卑異級靈虬承注陰蟲吐喻倏往
忽來鬼出神入微若抽繭逝如激雷耳不輟音
眼無留盼銅史司刻金徒抱箭屨薄非兢臨深
罔戰授受靡訐登降弗爽唯精唯一可法可象
月不遁來日無藏往分似符契至猶影響合昏

暮卷蕙英晨生尚辨天意猶測地情況我神造
通幽洞靈配皇等極爲世作程

石闕銘

昔在舜格文祖禹至神宗周變商俗湯黜夏政
雖格命殊乎因襲揖讓異於干戈而畧緯冥合
天人啓基克明峻德大庇生民其揆一也在齊
之季昏虐君臨威侮五行怠棄三正刑酷然炭
暴踰膏柱民怨神怒衆叛親離踏地無歸瞻烏
靡託於是我皇帝拯之乃操斗極把鉤陳翼百
神褫萬福龍飛黑水虎步西河雷動風驅天行
地止命旅致屯雲之應登壇有降火之祥龜筮

協從人祇響附穿胸露頂之豪箕坐椎髻之長
莫不援旗請奮執銳爭先憂首憑固庸岷負阻
協彼離心抗茲同德帝赫斯怒秣馬訓兵嚴鼓
未通凶渠泥首弘舸連軸巨檻接艦鐵馬千群
朱旗萬里折簡而禽廬九傳檄以下湘羅兵不
血刃士無遺鏃而樊鄧威懷也黔底定於是流
湯之黨握炭之徒守似藩籬戰同枯朽革車近
次師營商牧華夷士女冠蓋相望扶老携幼一
旦雲集壺漿塞野簞食盈塗似夏民之附成湯

殷士之窺周武安老懷少伐罪弔民農不遷業
市無易買八方入計四隩奉圖羽檄交馳軍書
狎至一日二日非止萬機而尊嚴之度不訾於
師旅淵默之容無改於行陣計如投水思若轉
規策定帷幄謀成几案曾未浹辰獨夫授首乃
焚其絳席棄彼寶衣歸璇臺之珠反諸侯之玉
指麾而四海隆平下車而天下大定拯茲塗炭
救此橫流功均天地明並日月於是仰協三靈
俯從億兆受昭華之玉納龍敘之圖類帝禋宗

光有神噐升中以祀群望搯袂而朝諸夏布教
都畿班政方外謀協上策刑從中典南服緩耳
西羈反舌劍騎穹廬之國同川共穴之人莫不
屈膝交臂厥角稽顙鑒空萬里攘地干都幕南
罷鄣河西無警於是治定功成邇安遠肅忘茲
鹿駭息此狼顧乃正六樂治五禮改章程創法
律置博士之職而著錄之生若雲開集雅之館
而款關之學如市興建庠序啓設郊丘一介之
才必記無文之典咸秩於是天下學士靡然向

風人識廉隅家知禮讓教臻侍子化洽期門區
宇又安方面靜息役休務簡歲阜民和歷代規
摹前王典故莫不芟夷翦截允執厥中以爲象
闕之制其來已遠春秋設舊章之教經禮垂布
憲之文戴記顯游觀之言周史書樹闕之夢北
荒明月西極流精海岳黃金河庭紫貝蒼龍玄
武之制銅爵鐵鳳之工或以聽窮省寃或以布
治懸法或以表正王居或以光崇帝里晉氏浸
弱宋歷威夷禮經舊典寂寥無記鴻規盛烈湮

沒罕稱乃假天闕於牛頭託遠圖於博望有欺
耳目無補憲章乃命審曲之官選明中之士陳
圭置臬瞻星揆地興復表門草創華闕於是歲
次天紀月旅太簇皇帝御天下之七載也構茲
盛則興此崇麗方且趨以表敬觀而知法物觀
雙碣之容人識百重之典作範垂訓赫矣壯乎
爰命下臣式銘盤石其辭曰

惟帝建國正位辨方周營洛涘漢啓岐梁居因
業盛文以化光爰有象闕是惟舊章青蓋南泊

黃旗東指懸法無聞藏書弗紀大人造物龍德
休否建此百常興茲雙起偉哉偃蹇壯矣巍巍
旁映重疊上連翠微布教方顯浹日初輝懸書
有附委篋知歸鬱崛重軒穹隆反宇形聳飛棟
勢超浮柱色法上圓制模下矩周望原隰俛臨
煙雨前賓四會却背九房壯通二轍南奏五方
暑來寒往地乂天長神哉華觀永配無疆

蠡杯銘

周邁羽杯珍踰渠腕實同蠡測形均樸滿伊我
疲病獨居無伴所不比挹誰誚誰緩

碑

天光寺碑

法雲旦聚則浸潤被乎重沙慧日晨燈則暉光
燭於有頃皇帝乃把神珠握靈鏡擊天鼓撞地
鐘驅日月之師勒星辰之陣九流外籍五明內
典鳥策餘文龍宮遺教莫不神遊房奧跡徧門
牆思洞希微言窮名象珉階凌虛瓊籬鬱起可
使龍城愧飾鴈塔慙珍日宇奪暉月宮掩麗昔
者姬水壽丘載紀山川之目丹陵負夏僅傳鄉

黨之名歌酒故邑賜復窮平身世壘麓舊里高
會止於當年銘曰

被物如露偃民猶草解髻傳珠拙衣受寶化違
宅火功超河雫捨我神居興茲靈館八襲豐殿
四柱高廊並陳金璧旁達玉箱從橫雜樹間厠
衆芳

墓誌銘

誌法師墓誌銘

法師自說姓朱名寶誌其生緣桑梓莫能知之
齊故特進吳人張緒興皇寺僧釋法義並見法
師於宋太始初出入鍾山往來都邑年可五六
十歲未知其異也齊宋之交稍顯靈迹被髮徒
跣負杖挾鏡或徵索酒肴或數日不食豫言未
兆懸識他心一時之中分身數處天監十三年
卽化於華林門之佛堂先是忽移寺之金剛像

出置戶外語僧衆云菩薩當去爾後旬日無疾而殞沉舟之痛有切皇心殞葬資湏事豐饌厚望方墳而隕涕瞻白帳而拊心爰詔有司式刊景行辭曰

欲化毗城金粟降靈猗歟大士權迹帝京緒胃莫詳也居罕見譬彼涌出猶如空現哀茲景像愍此風電將導舟梁假我方便形煩心寂外荒內辯觀徃測來覩微知顯動是墟立發言風偃業窮難詔因謝弗援慧雲晝歇慈燈夜昏

祭文

釋奠祭孔子文

於惟上德是曰聖真克明克峻知化窮神研幾
善誘藏用顯仁利同道濟成俗教民道尊功倍
德溥化光離經辨志濟濟洋洋

請雨賽蔣王文

陸周祚胤鍾嶽降精聰明正直得一居貞無方
無體不疾不行化馳九縣位冠百靈東掩屢憊
西郊已戢偶龍矯首泥人鶴立神聽孔戔靈應
揮霍儵覩翻伊俄聞倒洛樂周祈畢恩洽酒闌
靈談抗袖鬼笑撥拌推茲且引於萬斯歡

附錄

陸倕傳

陳姚察

陸倕字佐公吳郡吳人也晉太尉玩六世孫祖
子真宋東陽太守父慧曉齊太常卿倕少勤學
善屬文於宅內起兩間茅屋杜絕往來晝夜讀
書如此者數載所讀一遍必誦於口嘗借人漢
書失五行志四卷乃暗寫還之略無遺脫幼爲
外祖張岱所異岱嘗謂諸子曰此見汝家之陽
元也十七舉本州秀才刺史竟陵王子良開西

邱延英俊倅亦預焉辟議曹從事參軍廬陵王
法曹行參軍天監初爲右軍安成王外兵參軍
轉主簿倅與樂安任昉友善爲感知已賦以贈
昉昉因此名以報之遷驃騎臨川王東曹掾是
時禮樂制度多所創革高祖雅愛倅才乃敕撰
新漏刻銘其文甚美遷太子中舍人管東宮書
記又詔爲石闕銘記奏之敕曰太子中舍人陸
倅所製石闕銘辭義典雅是爲佳作昔虞丘聘
物耶鄆獻賦賞以金帛前史美談可賜絹三十

正遷太子庶子國子博士母憂去職服闋爲中
書侍郎給事黃門侍郎揚州別駕從事史以疾
陳解遷鴻臚卿入爲吏部郎參選事出爲雲麾
晉安王長史尋陽太守行江州府州事以公事
免左遷中書侍郎司徒司馬太子中庶子廷尉
卿又爲中庶子加給事中揚州大中正復除國
子博士中庶子中正並如故守太常卿中正如
故普通七年卒年五十七文集二十卷行於世
第四子續早慧十歲通經爲童子奉車郎卒

陸倕傳

唐李延壽

倕字佐公少勤學善屬文於宅內起兩茅屋杜絕往來晝夜讀書如此者數歲所讀一徧必誦於口嘗借人漢書失五行志四卷乃暗寫還之略無遺脫幼爲外祖張休所異休嘗謂諸子曰此兒汝家陽元也十七舉本州秀才刺史竟陵王子良開西邸延英俊倕預焉梁天監初爲右軍安成王主簿與樂安任昉友爲感知賦以贈昉昉因此名以報之及昉爲中丞簪裾輻湊預

其謙者啟芸到漑劉苞劉孺劉顯劉孝綽及倕
而已號曰龍門之遊雖貴公子孫不得預也遷
臨川王東曹掾梁武帝雅愛倕才乃敕撰新漏
刻銘其文甚美遷太子中舍人又詔爲石闕銘
敕褒美之賜絹三十疋累遷太常卿卒子瓚早
慧七歲通經爲童子郎卒次緬有似於倕一者
殆不能別

太常卿陸儒基銘

梁元帝

如金有鑛如竹有筠體二方擬知十可隣兩升
鳳沼三侍龍樓南皮朝宴西園夜遊詞峰颺豎
逸氣雲浮日徃月來暑流寒襲東耀方遠北芒
已及墜露曉團悲風暮急

酬陸長史僊

梁劉孝綽

王粲始一別猶且歎風雲况余屢之遠與子亟

離群如何持此念復爲今日分分悲宛

一作悵如

昨弦望殊揮霍行舟雖不見行程猶可度度君

路應遠期寄新詩返相望且相思勞朝復勞晚

薄暮聞人進果得承芳信殷勤覽妙書留連披

雅韻冽洲

一作州

財賦總慈山行旅鎮已切臨睨

情遽動思歸引歸歟不可卽前途方未極覽諷

欲諼誚研尋還慨息來喻最雕金比質非所任

虛薄無時用徘徊守故林
屏居青門外結宇灞
城陰竹庭已南映池牖
復東臨喬柯貫簷上垂
條拂戶陰條開風暫入
葉合影還沈帷屏溽早
露階雷擾昏禽衡門謝
車馬賓席簡衣簪雖愧
陽陵一作春曲盡無流水
琴蕭條聊屬和寂寞少
知音平生竟何托懷抱
共君深一朝四美廢方
見百憂侵曰余濫官守
因之泝廬一作九水接
淺原陰山帶荆門右從
容少職事疲病疎僚友
命駕獨尋幽淹留宿廬
阜廬阜擅高名岩岩凌

太清舒雲類紫府標霞同赤城北上輪難進東
封馬易驚未着茲山險車騎息逢迎山橫路似
絕徑側樹如傾蒙籠乍一啓磔硤無暫平倚巖
忽迴望援蘿遂上征乍觀秦帝石復憇周王城
交峰隱玉霄對澗距金楹風傳鳳臺瑄雲渡洛
賓笙紫書時不至丹爐且未成無因追羽翮及
爾宴蓬瀛蓬瀛不可託悵然反城郭時過馬鳴
院偶憇鹿園閣旣異人世勞聊比化城樂影塔
圖花樹經臺總香藥月殿曜朱旛風輪和寶鐸

圉援

一作垣

卽重嶺階基仍巨壑朝援

一作援

響薨

棟夜水聲帷薄餘景鶩登臨方宵盡談詡談詡

有名僧慧義似傳燈遠師教逾闢生公道復弘

小乘非汲引法善招報能積迷頓已悟爲懽得

未曾爲懽誠已往坐卧猶懷想况復心所積

一作

親茲地多諸賞惜哉無輕軸更泛輪湖上可思

不可見離念空盈蕩賈生傳南國平子相東阿

優游匡贊罷縱橫辭賦多方才幸同貫無令絕

詠歌幽谷雖云阻煩君計吏過

侍宴餞陸倕應令

梁蕭子顯

儲皇餞離送廣命傳羽觴侍遊追曲水開宴等
清漳新泉已激浪初卉始含芳雨罷葉增綠日
斜樹影長

遺事

張率陸倕幼相友狎常同載詣沈約值任昉在焉約謂昉曰此二子後進才秀皆南金也卿可與定交由此與昉友善

梁書

昭明作宴闌思舊詩其敘陸倕云佐公持文介

才學罕爲儔

昭明集

昭明與晉王令曰陸生資忠履貞冰清玉潔文該四始學遍九流高情勝氣貞然直上

梁書

陸倕墓在吳縣綬山鄉墓石從子襄爲序湘東

王繹爲銘普通二年立

姑蘇志

何敬容署名敬字大作苟少爲文容字大爲父

陸倕戲之曰公家苟旣奇大父亦不少敬容不

能答

南史何敬容傳

紀少瑜嘗夢陸倕以一束青縷管授之云我以

此筆猶可用卿自擇其善者因此適進

竟陵西邸高祖與沈約謝朓王融蕭琛任昉陸

倕並遊焉號曰八友

梁武帝紀

集評

任昉陸倕之筆斯文章之冠冕述作之楷模

文與湘
東王書